

釋氏十
三經註
疏

楞嚴經纂註

卷一
之二

三十冊



大佛頂首楞嚴經纂註題辭

界師纂註舊本。余十年前曾見之。去秋晤於南翰官舍。折示今本。則改竄已十五六。蓋取諸家之說。芟夷煩冗。會歸精約。而間附己意。不但作聖經孝子。且爲諸師忠臣。其功顧不劬歟。雖然。楞嚴有顯密。經首云。卽時如來敷座宴安。爲諸會中宣示深奧。法筵清眾。得未曾有。迦陵仙音徧十方界。如來有示。清眾有得。音聲普聞。而無一字。此密楞嚴也。慶喜殷勤啟請。如來妙辯演說。此顯楞嚴也。顯以詮密。則十卷經文。已爲註腳。註腳之下。又添註腳。入海算沙。竟亦何益。對

盲者說天如蓋如雞子。其理不得不然。有目者則仰
面一觀而已。界師約諸家之意。蓋不獨爲盲者設。而
所望於有目者尤至。願與善讀楞嚴之士共勉之。
萬歷乙未三月十日眞實居士馮夢禎時遊雙徑憩
文殊臺靜室敬題

歲戊寅。予於山中讀楞嚴。時諸名衲畢集。予訊經中如是世界因動有聲。因聲有色義。酬者悉枝蔓。幻居上人獨謂予曰。動爲業本。一切諸法本自寂滅。一念心動。六亂橫生。其言因動有聲。因聲有色。謂一涉於有。則法法皆有耳。予灑然異之。乃上人於此經朝夕探索不已。逮甲午。越十有七年。其所纂註四易藁而成。以示予於秣陵。且謂予曰。曩子所問。予所告者。何獨一章之旨。實囊括全經矣。夫因動有聲。顛倒眾生因之輪轉也。入流亡所。觀音大士以之圓通也。蓋心本無心。相元無相。而眾生不覺一念妄動。由塵發知。

妄見於心。因根起相。妄見於相。由是而七趣昏擾。沒溺長夜。動也。若達相見無性。猶若交蘆。則內無能推之心。外無所現之相。由是而動靜二相了然不生。空所空滅。寂滅現前。亡也。動則見空。見色。故曰迷妄有虛空。依空立世界也。亡則空色皆真。故曰一人發真歸元。十方虛空悉皆銷殞也。是故七徵之所破者。破此動也。八還之不可還者。還此亡也。動則聽不越聲。視不踰色。一身且胡越。亡則陰入處界莫非妙圓。地水火風不相陵滅。殫二十五聖之所證。窮五十五位之所詣。皆盡此動。竟此亡耳。故曰。入於如來妙莊嚴。

海圓滿菩提歸無所得。予曰。歸無所得。又何以見。何以修。何以證也。曰。動則有苦。非見無所得。修無所得。證無所得。無以息苦也。雖在十地。猶有學佛煩惱。况具縛哉。予聞之。若喝者之得冷風。上人命予卒讀其書。意或有所異同乎。予掩卷曰。子旣已示我矣。見狻猊而復欲試其猛力。不亦過計乎。註之得於長水溫陵者十之七。得於泐潭孤山諸家者十之二。得於上人之獨見者十之一。諸師名號不復錄。以融而爲一。則經旨脉絡相屬。讀者爲便。且諸師所說。世習見之。讀可自見也。此上人所語予者。卒之卷未嘗展也。

萬歷甲午十月晦日那羅延窟學人瞿汝稷槃談撰

大佛頂首楞嚴經纂註序

夫楞嚴三昧。本然清淨。匪由悟得。豈藉修成。然智鏡長昏。捨妙悟。何能大朗。心珠久翳。假圓修。始得廓清。是以慶喜。因邪染而詢最初方便。世尊依妄緣而詰因地發心。見相生心。誠爲迷真認妄。徵心辯見。實乃破妄顯真。雖顯真而破妄。仍會妄以歸真。破斥重重。意使知真識妄。會通法法。欲其了妄卽真。故當機聞微妙開示。而倒想銷亡。真心頓悟。滿慈聆第一義諦。而所知障蔽。疑問風生。清淨本然。世界眾生。因迷妄起。如空澄寂。浮虛華相。從翳幻生。悟之則清淨本然。

迷之則山河大地背覺合塵執諸相而致相傾相奪滅塵合覺圓一性而得互徧互容迷真妙覺明山河大地從茲頓現得妙空明覺有爲習漏何當復生迷方旣悟不復更迷幻翳若除空華永滅金出鑛豈重爲鑛木成灰何再生枝聞斯而真妄先後之見應銷達此而悟迷始終之疑永息於是雖知法從妄有未明妄何所因故先引達多照鏡狂走喻妄想因無所在次勸滿慈不分別法令狂心歇卽菩提而當機復疑菩提之心合從因緣而得故世尊重引達多之事明非假藉而成繼此顯無戲論法結責多聞勸修無

漏。由是得執銷心悟。獲天王宅。求造入門。然詣大涅槃。要依本發心路。入佛知見。須假攝伏根門。故初審因地發心。令以湛旋其生滅。而伏還元覺。次審煩惱根本。教依根逆彼業流。而循順圓通。擊鍾顯常。悟聞性。則不執常爲斷。綰巾示結。解狂心。卽得妙證。無生。一六亡義。雖知圓通本根未悉。故先敕諸聖說修行方便。次命文殊。選眞實圓通。宣清淨明誨。以攝初心。演祕密伽陀。令銷宿習。於是遠客識歸家之路。旅人得賜屋之門。五十五位。由是路以趣登。單複十二。假斯門而證入。然則眞如界內。雖亡悟修之迹。生滅門

中。豈礙解入之名。文殊請示經題。實爲流通大法。世尊精研界趣。意在禁遏迷情。繼復詳辯陰魔。盡芟見刺。塞迷津之邪徑。啟法殿之正階。圓滿菩提。歸無所得。兩忘真妄。一契果因。究竟窮源。斯經爲最。余始窺會解。頗信於佛旨。無遺久翫經文。漸覺於聖心未盡。潛神默究。稍獲端倪。由是搜諸家之章疏。纂眾解之精微。明宗趣而辯枿異同。會問答而申明隱略。其猶捧土何增萬仞。掬水豈益九淵。不揆闇短。妄擬會通。採集羣言。目爲纂註。所冀依文了義。頓悟常住真心。如說修行。速證楞嚴三昧。寓徑山沙門眞界述。

楞嚴釋疑

釋疑之說。因學法者披閱此經。於奢摩他三摩禪那處。或從古註。或執已見。以理爲行。迷見爲修。旨意不明。讀今纂註。不能無疑。故此先明宗本。而後略舉數條以釋焉。原夫妙奢摩他三摩禪那者。乃一經之大本。三分之綱宗也。奢摩他者。寂靜義也。三摩者。明照義也。禪那者。明靜不二義也。性體本覺。謂之明覺體本寂。謂之靜明。靜不二。謂之體。此約明靜之體言也。卽究竟堅固之理。亦謂之安住定也。良以明靜之體。俄然晦昧。動念瞥生。卽本明而爲無明。全本靜而成

動念。於是因動以修止。止其動也。因昏以修觀。觀其昏也。止觀功著。昏動自亡。明靜自復矣。此約止觀之用言也。卽究竟堅固之行。亦謂之引起定也。經云有三摩提。名大佛頂首楞嚴。王具足萬行。斯則奢摩他等通於理行明矣。故阿難首問十方如來得成菩提妙奢摩他三摩禪那最初方便者。意在明究竟堅固之理。而爲修行之本。非問進修之行也。蓋十方如來由明此妙奢摩他三摩禪那爲最初方便而得成菩提之果。是以阿難卽指果體以問初因。豈非意在明究竟堅固之理耶。則最初方便。只可指信解真正。不

當復說耳根圓通。且三卷半經皆屬見道。此豈問修是知初問爲見道分之總問也。又阿難請示奢摩他路。意在求示自性首楞嚴妙莊嚴路。非求示止行也。然奢摩他等既通理行矣。以之爲自性。非惟不違於理。亦乃發請示者之本意耳。所以世尊放光之後。先指真妄二心。以明生死涅槃根本。後卽牒其問意云。汝今欲知奢摩他路。願出生死。蓋妄心是無始生死本也。真心是出生死證涅槃本也。既以欲知奢摩他路爲願出生死。豈非欲知奢摩他路是欲知自性乎。由是卽舉拳以問。意在驗其用心真妄。因其復認能

推卽咄而告言。此是前塵虛妄相想。乃至結示云。皆由執此生死妄想。誤爲真實。故不成聖果。然上所開示。但欲其識妄知真。而出生死。文中未嘗論修。故知請示奢摩他路。是求示自性。非求示止也。又阿難聞見見非見。重增迷悶。卽復請云。惟願弘慈。施大慧目。開示我等覺心明淨。此欲求釋迷悶。得心明淨也。而世尊將欲敷演大陀羅尼諸三摩提妙修行路。告阿難言。汝雖疆記。但益多聞。於奢摩他微密觀照。心猶未了。故於眞見體用而生迷悶。蓋眞見體也。寂照用也。以眞見之體。法爾具寂照之用。是則寂而常照。故

能照了見精是妄。照而常寂。故見非是見。阿難旣於眞見體用二俱不達。而增迷悶。世尊卽復指同別二見。重示奢摩他觀照云。本覺明心。覺緣非眚。覺所覺眚。覺非眚中。此實見見。蓋本覺明心。卽大陀羅尼也。覺緣非眚等。卽諸三摩提妙修行路也。由本覺之體寂而常照。故能覺了諸緣是妄。照而常寂。故不墮於眚中。此實見見之時。見非是見。卽重示奢摩他觀照。以釋見見非見之迷。令其覺心明淨也。或謂旣云奢摩他觀照。又云諸三摩提妙修行路。豈非示進修止觀。何局于見道耶。答。不然。以此文中是破妄見妄覺。